

COMISIÓN INFORMATIVA DE CULTURA, DEPORTES E MOCIDADE

ACTA da mencionada comisión informativa, correspondente ao día **17 de setembro de 2020**

No salón de sesións do Pazo Provincial, ás 18.00 horas do día 17 de setembro de 2020, reúnese a comisión informativa de Cultura, Deportes e Mocidade, coa asistencia dos seguintes deputados e deputadas:

Presidenta: D.^a Ana Patricia Torres Madureira

Deputados/as do Grupo Popular:

D. Álvaro José Fernández López

D.^a Consuelo Vispo Seara

D. César Manuel Fernández Gil

D.^a Ana María Villarino Pardo

Deputados/as do Grupo Socialista:

D.^a Susana Rodríguez Estévez

D. Álvaro Vila Araújo

D.^a Margarita Pérez Fernández

Deputado de Democracia Ourensana: D. José Miguel Caride Domínguez

Deputado do BNG: D. Bernardo Varela López

Deputada de Ciudadanos-Partido de la Ciudadanía: D.^a Montserrat Lama Nóvoa.

Secretario: D. Juan Marquina Fuentes

Interventora: D.^a Begoña Álvarez Matos

Seguidamente, iniciouse o tratamento dos asuntos incluídos na orde do día, do xeito que se reflicte a continuación:

1º.- APROBACIÓN DA ACTA DA SESIÓN ANTERIOR, CORRESPONDENTE Á ORDINARIA DO DÍA 23 DE XULLO DE 2020.-

Pola Secretaría Xeral deuse traslado do borrador da acta anterior, correspondente á ordinaria do día 23 de xullo de 2020.

Non se producen intervencións e por unanimidade a comisión adopta o seguinte

acordo:

Aprobar a acta da sesión ordinaria da Comisión Informativa de Cultura, Deportes e Mocidade do día 23 de xullo de 2020, conforme co borrador elaborado pola Secretaría Xeral.

2º.- NOMEAMENTO DO XURADO PARA A XVII EDICIÓN DO PREMIO PURA E DORA VÁZQUEZ DE NARRACIÓN E ILUSTRACIÓN DE LITERATURA INFANTIL E XUVENIL

A presidenta da comisión dá conta da proposta.

Non se producen intervencións, e por unanimidade, a comisión adopta o seguinte acordo:

Designar como membros do xurado da XVII edición do Premio Pura e Dora Vázquez de Narración e Ilustración de Literatura Infantil e Xuvenil, ás seguintes persoas:

- Don José Manuel Fernández López (proposto polo Grupo Popular).
- Don Luís Gulín Iglesias (proposto polo Grupo Socialista).
- Don Rochi Nóvoa Vázquez (proposto polo grupo de Democracia Ourensana)
- Dona Isabel Mociño González (proposta polo grupo do BNG).
- Don Xan Xosé Rodríguez González (proposto polo grupo de Ciudadanos-Partido de la Ciudadanía).

3º.- OUTORGAMENTO DO TÍTULO DE FILLO ADOPTIVO DA PROVINCIA DE OURENSE A DON MANUEL GARCÍA DE BUCIÑOS VÁZQUEZ.-

A presidenta dá conta da proposta.

Todos os portavoces dos diferentes grupos mostran a súa conformidade coa proposta.

Non se producen máis intervencións e, por unanimidade, a comisión ditamina favorablemente a adopción, por parte do Pleno, do seguinte acordo:

- Outorgarlle o título de Fillo Adoptivo da Provincia de Ourense a don Manuel García de Bucíños Vázquez, de conformidade cos artigos 1, 7, 9, 10 e 11 do Regulamento de honores e distincións da Deputación de Ourense, e consonte coa proposta formulada polo instrutor do expediente.

4º.- REGULAMENTO DE UTILIZACIÓN E FUNCIONAMENTO DO PAZO DOS DEPORTES “PACO PAZ”

A presidenta dá conta da proposta.

Todos os portavoces dos diferentes grupos mostran a súa conformidade coa proposta.

Non se producen máis intervencións e, por unanimidade, a comisión ditamina favorablemente a adopción, por parte do Pleno, do seguinte acordo:

1º) Aprobar inicialmente o Regulamento de utilización e funcionamento do Pazo dos Deportes “Paco Paz”, co seguinte contido:

Artigo 1. Servizos ofertados

1. Actividades físico-deportivas dirixidas e realizadas nos distintos espazos deportivos do Pazo dos Deportes cunha finalidade recreativa e saudable. (Escolas Deportivas, Programas de Fitness para adultos e outros servizos deportivos complementarios)

2. Posibilitar o uso racional e adecuado das instalacións para adestramentos semanais e competicións durante a fin de semana a federacións, clubs e resto de entidades deportivas e particulares.

3. Facilitar a celebración de eventos culturais, recreativos e deportivos promovidos pola propia Deputación Provincial ou por entidades varias, co obxectivo de conseguir a participación da cidadanía, ben pola súa implicación como espectador, ben como deportista.

Artigo 2. Horarios de apertura ao público das instalacións

Os horarios que se recollen a continuación son horarios tipo que se fixan con carácter xeral pero poderán ser modificados de forma puntual durante a tempada deportiva, en función dos intereses deportivos da instalación e os seus usuarios.

<i>INSTALACIÓN SERVIZO</i>	<i>HORARIOS</i>
<i>SALA DE FITNESS</i>	<i>Luns a venres : de 6.45 a 23.00 horas</i> <i>Sábados: de 9.00 a 13.00 horas</i>
<i>CLASES COLECTIVAS</i>	<i>Luns a venres: de 7.00 a 22.00 horas</i> <i>Horarios e clases establecidos no cadro de actividades.</i>
<i>FISIOTERAPIA</i>	<i>Luns: de 9,30 a 13,30 / 16.00 a 20.00 h</i> <i>Martes: de 10.00 a 13.30 h. / 16.00 a 20.30 h.</i> <i>Mércores: de 10.00 a 13.00 h. / 16.00 a 20.00 h.</i> <i>Xoves: de 9.30 a 13.00 h. / 16.30 a 21.30 h.</i> <i>Venres: de 10.00 a 12.00 h. /16.00 a 18;00 h</i>

ZONA DE AUGAS / SPA	<i>Luns: (homes) de 9.00 a 13.00 h. / 16.00 a 23.00 h.</i> <i>Martes:(mulleres) de 7.00 a 13.00 h. / 16.00 a 22.00 h.</i> <i>Mércores:(homes) de 7.00 a 13.00 h. /16.00 a 22.00 h.</i> <i>Xoves:(mulleres) de 9.00 a 13.00 h. / 16.00 a 23.00 h.</i> <i>Venres: (homes) de 9.00 a 13.00 h. / 17.00 a 22.00 h.</i>
LUDOTECA	<i>Luns a venres: de 16.00 a 22.00 horas.</i>
PISTAS POLIDEPORTIVAS	<i>En función da actividade e en horario de 07,00 a 23,00 h.</i>

Artigo 3. Instrucións xerais de aplicación para as persoas usuarias

1. Todo usuario que aboase a cota correspondente ten dereito a utilizar o servizo ou instalación nas condicións fixadas na actual normativa. No prezo inclúese a utilización dos equipamentos necesarios para o desenvolvemento da actividade, así como a utilización de vestiarios, aseos e duchas. Existen servizos adicionais polos que será necesario realizar un pago á parte, como fisioterapia, spa, cursos de pilates, etcétera.

2. Para a correcta utilización das instalacións será imprescindible o uso de indumentaria e calzado deportivo adecuado. Segundo a normativa vixente, non estará permitido fumar, nin a entrada de animais en ningunha das dependencias das instalacións, fóra dos que sirvan de guía a persoas con discapacidade.

3. Está terminantemente prohibido o consumo de drogas ilegais ou substancias dopantes en toda a instalación, así como permanecer nela en estado de embriaguez ou baixo os efectos de calquera substancia estupefaciente.

4. Non se poderá acceder aos espazos deportivos, vestiarios, nin a ningunha outra dependencia dos centros deportivos, con recipientes ou envases de vidro, metal ou calquera outro material que non sexa de plástico ou papel, así como con calzado de rúa ou non adecuado para o uso deportivo.

5. De conformidade coa lexislación vixente sobre protección do dereito á honra, á intimidade persoal e familiar e á propia imaxe e á protección, queda terminantemente prohibida a realización de fotografías e/ou vídeos das instalacións e das persoas que nelas se atopen, sen expresa autorización por escrito da instalación, ou sen o expreso consentimento destas, por tal motivo.

6. Para evitar perturbar o bo funcionamento do servizo, e salvagardar a seguridade e o ben común, deberase:

- Seguir as indicacións do persoal da instalación e monitores.
- Facer uso de cada instalación para o que especificamente está destinada e non permanecer nas instalacións despois do peche sen estar autorizado.
- Non ter actitudes antihixiénicas nin indecorosas. Non ensuciar os espazos deportivos nin os seus elementos auxiliares e sempre utilizar as papeleiras.
- Prohíbese expresamente a utilización de calquera sistema de afeitado ou depilación.
- Non ter comportamentos que impliquen perigo para a integridade física dos demais usuarios.
- Deberá facerse un uso correcto do material e equipamento, así como das instalacións.
- Non expoñer carteis publicitarios ou anuncios sen a autorización da dirección do centro, e, se procedese, só se poderán expoñer no taboleiro de anuncios habilitado para tal fin.

7. A Deputación Provincial non se responsabiliza dos obxectos perdidos, abandonados ou subtraídos na instalación. Aconséllase non acudir á instalación con obxectos de valor e sempre utilizar o servizo de despachos de billetes.

8. Ao Pazo non se poderán introducir bicicletas, patíns, scooters ou medios similares, que deberán quedar aparcados nos exteriores da instalación.

Artigo 4. Dereitos e obrigas das persoas usuarias

1. Toda persoa usuaria ten dereito a:

- a) Gozar do uso das instalacións en óptimas condicións dentro do horario e cuadrante de clases, establecido polo centro para uso libre e exposto ao público.
- b) Ser informada dos requisitos e condicións para acceder á instalación, de todas as posibles vantaxes, bonificacións e tarifas reducidas ás que puidese ter dereito.
- c) Ser informado en calquera dos idiomas oficiais da Comunidade Galega, galego ou castelán.
- d) Utilización das instalacións ás que lle dan dereito as características e tipo de servizo solicitado, dentro dos horarios establecidos e tras o previo pago das correspondentes cotas.
- e) Presentar calquera queixa ou suxestión e recibir contestación por parte da dirección. As reclamacións oficiais deberán tramitarse de conformidade coa lexislación vixente.
- f) Asesoramento e asistencia deportiva por parte dos monitores de cada actividade, cando se trate de actividades dirixidas.
- g) Respecto da súa personalidade, dignidade e intimidade.
- h) De maneira especial protexeranse os dereitos que asisten ao usuario con respecto á

lexislación sobre protección de datos de carácter persoal.

2. Toda persoa usuaria estará obrigada a:

- a) Respetar as normas xerais que se recollen neste regulamento e as específicas que se desenvolven máis adiante en función do espazo ou servizo para utilizar.
- b) Gardar o debido respecto aos demais consumidores e ao persoal da instalación deportiva.
- c) Aboar, para a actividade contratada, a cota correspondente establecida na ordenanza reguladora, previamente ao goce da actividade.
- d) Coidar e manter en bo estado o equipamento e material á súa disposición para a práctica deportiva e do resto do mobiliario e equipos da instalación.

Artigo 5. Normas específicas de aplicación aos diferentes espazos

5.1 Sala de cardio e pesas e salas de uso colectivo:

- a) O número máximo de usuarios/hora nas salas estará determinado polo aforo de cada unha delas, sendo o persoal técnico o responsable de velar polo seu cumprimento en función das circunstancias. Para acceder á sala haberá que esperar a que o número de usuarios sexa inferior ao exposto no apartado anterior, salvo cando a organización dos exercicios que se estean levando a cabo permita un número de usuarios maior, debéndose preservar en todo momento polo monitor da sala e/ou operario de control, a habitabilidade e confort dos usuarios.
- b) Os usuarios poderán utilizar libremente a sala de cardio e pesas, durante todo o horario de apertura, indicado no cadro de horarios da instalación e asistir a cantas clases desexen, sempre que a actividade o permita, de entre todas as que se ofrecen de uso libre nas instalacións.
- c) A idade para acceder a esta zona é de 16 anos. Para poder facelo con 15 anos deberán contar con autorización paterna ou materna ou dos seus titores. Este requirimento está detallado máis adiante, no artigo 6º, apartado 6.
- d) Para acceder ás clases dirixidas poderase establecer un sistema de reserva previa.
- e) Durante determinados períodos vacacionais poderán existir horarios reducidos, e axustes nos horarios de clases colectivas. Estes cambios serán indicados nos soportes informativos habituais, coa suficiente antelación.
- f) Non se poderá acceder ás salas con bolsas, mochilas, etcétera.
- g) É obrigatorio o uso de toalla durante o adestramento, ademais de proceder a deixar en perfecto estado de uso os bancos e máquinas ao acabar o exercicio, estando expresamente prohibido arroxar as mancuernas, pesas ou discos ao chan. Calquera deterioración por un uso inadecuado destes deberá ser aboado pola persoa que os causara.
- h) Non está permitido o acceso e utilización das salas e do seu material, sen a

presenza dun monitor. Non se permitirá a entrada ás salas 10 minutos despois de comezar as clases.

- i) O número mínimo para impartirse unha clase será de 5 usuarios, aínda que, en función do período do ano e a demanda de actividade, poderá reducirse ou incrementarse este número.
- j) Poderá fixarse un tempo máximo de utilización das máquinas de cardio e pesas, para evitar monopolizar o uso destas.
- k) Será obrigatorio recoller e ordenar o material utilizado ao finalizar o exercicio. Non se poderá sacar material da sala sen autorización.
- l) Está prohibida a gravación ou toma de fotos tanto nas salas de cardio e pesas e clases dirixidas. Por tal motivo, o uso do teléfono móbil restrínxese para uso exclusivo de audio.
- m) Deberase permanecer vestido en todo momento, é dicir sen poder quitarse a camiseta. Para acceder ás salas será imprescindible o uso de indumentaria e calzado deportivo adecuado.
- n) Non estará permitido o acceso con chancletas. Poderanse establecer normas específicas para o acceso a programas especiais como “adestramentos persoais”, e non se poderá reservar previamente bicicleta nas sesións, especialmente nas de Ciclismo Indoor.
- o) O Pazo dos deportes “Paco Paz” resérvase o dereito para eliminar, incrementar ou modificar clases, horarios, monitores e servizos en función das necesidades e intereses do Centro, previa comunicación, coa debida antelación, nos soportes habituais de información.

5.2 Ludoteca:

- a) Só se permitirá facer uso do servizo de ludoteca durante o tempo que o usuario/a responsable do neno/a permaneza nas instalacións do Pazo realizando algunha actividade.
- b) Se o neno ten algún problema de saúde física ou mental, ou de sociabilidade, os pais ou titores deberán indicarllo á persoa responsable
- c) Os nenos/as deberán velar polo coidado dos xoguetes e demais material.
- d) Existe unha normativa específica para o uso da Ludoteca, que as persoas usuarias deberán coñecer e que está exposta ao público nos seus locais.

5.3 Zona de augas - SPA:

- a) O acceso ao spa será previo pago dunha entrada puntual ou para os abonados que estean en posesión dun bono anual de SPA. A cita para o servizo solicitarase, ben presencialmente na recepción da instalación ben on-line na web do Pazo.
- b) Non está permitido o acceso a menores de 15 anos. Os menores de 16 deberán contar con autorización paterna ou materna, ou dos seus titores.

- c) Está prohibido a manipulación dos botóns de control das cabinas, e a utilización de calquera aparello electrónico.
- d) É obrigatorio ducharse antes de usar as instalacións do spa. Tamén é obrigatorio o uso de toalla, traxe de baño, gorro e calzado de baño.
- e) Está prohibido afeitarse, depilarse, tinguirse ou calquera outra acción similar de hixiene persoal, así como acudir con maquillaxes, cremas ou apósitos de calquera tipo.
- f) Está prohibido comer, beber ou deixar calquera obxecto nas zonas de baño.
- g) Prohíbese o acceso a persoas con calquera patoloxía infecto-contaxiosa.
- h) O tempo límite de permanencia continua no spa é de 60 minutos.

5.4 Vestiarios:

- a) Prohíbese expresamente a utilización de calquera sistema de afeitado ou depilación. Non está permitido comer no interior dos vestiarios.
- b) As “taquillas” só se poderán utilizar durante o tempo que o usuario permaneza na instalación. O sistema de peche das “taquillas” será a través de combinación ou moeda de 1 € de uso persoal por cada usuario. A instalación non se fai responsable da perda ou subtracción de obxectos depositados tanto nas “taquillas” como no interior dos vestiarios.
- c) Queda prohibido o uso de teléfono móbil dentro dos vestiarios.
- d) O tempo máximo de aseo persoal dentro do vestiario non poderá exceder de 20 minutos.

5.5 Fisioterapia

Para acceder ao servizo de fisioterapia, será necesario estar aboado ou en posesión dunha entrada de día, tras o previo pago do correspondente servizo.

A cita para o servizo deberá solicitarse na recepción ou na web, debendo facer o pago no mesmo momento.

5.6 Escolas Deportivas

As Escolas Deportivas gozan dunha programación específica que se establece ao comezo de cada tempada deportiva e cada unha delas teñen as súas propias peculiaridades e normas que figuran nos folletos informativos que se poñen ao dispor dos usuarios: modalidade deportiva, idade dos participantes, cotas trimestrais, días de prestación e horarios, profesorado, entidade prestadora do servizo, etcétera.

Para os usuarios deste servizo rexen os mesmos dereitos e obrigacións que para o resto de actividades da instalación.

5.7 Pistas polideportivas

O uso das pistas polideportivas está regulada polas seguintes normas:

- a) Uso para toda a tempada deportiva por parte de entidades deportivas, federacións ou particulares. Ten unha regulación específica mediante convocatoria pública que se aproba pola Deputación Provincial de Ourense e publícase anualmente no Boletín Oficial da Provincia.
- b) Uso puntual por parte de entidades deportivas, federacións ou particulares que se concerta directamente coas oficinas administrativas do Pazo dos Deportes.
- c) Uso durante a fin de semana por parte de entidades deportivas, federacións ou particulares para o deporte de competición federado (adestramentos ou partidos), e que se poderá concertar puntualmente ou para toda a tempada deportiva.
- d) O seu horario de uso é o estritamente aboado/contratado coa instalación, sendo o persoal de servizos o que determine a hora de acceso e saída da pista.
- e) Tanto para o pavillón auxiliar como para o pavillón principal o uso da pista completa requirirá un mínimo de 6 usuarios e as medias pistas ou en disposición transversal 4 usuarios.
- f) Non se poderá acceder ás pistas con calzado de rúa ou calzado deportivo procedente do exterior.
- g) Para acceder ás pistas será imprescindible o uso de indumentaria e calzado deportivo adecuado. Deberase permanecer vestido en todo momento, é dicir sen poder quitarse a camiseta.

5.8 Outros espazos útiles

Aínda que non se consideran espazos deportivos convencionais, existe a posibilidade de uso doutras áreas anexas como “espazo tras redes”, corredores, salas de uso polivalente, que os usuarios entenden operativos para a prestación de servizos deportivos específicos. A estes espazos resulta, por analoxía, de aplicación esta normativa e aqueloutra que se puidese establecer puntualmente para tal fin. A utilización destes espazos deberá contar coa autorización correspondente.

Artigo 6. Condición de persoa usuaria. Alta e tramitación

1. A condición de persoa usuaria do Pazo dos Deportes, obtense coa inicial inscrición e o pago da primeira cota. A inscrición implica a aceptación da normativa de aplicación en particular deste regulamento.
2. O uso da tarxeta ou mecanismo de acceso é persoal e intransferible. No caso de cesión ou transmisión do dispositivo de acceso a calquera outra persoa distinta do titular supoñerá a perda da condición de abonado. A perda do dispositivo de acceso deberase comunicar inmediatamente ao Pazo dos deportes “Paco Paz”.
3. As entradas xerais serán válidas para un único día, e permitirán ao usuario a libre utilización das instalacións dentro do horario establecido. As entradas específicas permitirán o

uso de determinadas partes da instalación durante un determinado período de tempo.

4. En caso de precisar a emisión dun duplicado pola perda ou destrución da tarxeta de abonado, deberá aboar a cantidade de 1 €. En caso de baixa, o abonado estará obrigado a comunicalo coa antelación establecida.

5. Os *cursillistas* non abonados terán restrinxido o acceso ao resto de actividades do Pazo, salvo que sexan abonados ou estean en posesión dunha entrada de carácter puntual.

6. As persoas de 15 anos e menores, non poderán acceder ás actividades colectivas, salvo escolas de iniciación, nin á sala de fitness, debendo orientar a súa actividade física ás habilidades, capacidades e destrezas motrices básicas e específicas. Excepcionalmente os usuarios de 15 anos poderán acceder sempre que cumpran os seguintes requisitos:

- A solicitude de inscrición e autorización deberán constar asinadas polo pai, nai ou titor legal, e informe favorable do técnico da sala de fitness. Coa sinatura deste documento, a persoa asinante como pai, nai ou titor legal faise responsable de todos os actos do menor nas instalacións do Pazo dos Deportes e manifesta que este reúne as condicións físicas necesarias para a práctica do fitness, exonerando plena e expresamente ao Pazo dos Deportes de calquera eventualidade, contratempo, dificultade, problema, lesión ou accidente que por tal circunstancia se poida producir.

7. O importe inicial da primeira cota deberá aboarse mediante cargo en tarxeta bancaria no momento da inscrición ou mediante presentación de boletín de ingreso bancario na conta da Deputación Provincial. Para o resto das cotas o aboado poderá elixir entre as seguintes formas de pago: tarxeta bancaria, domiciliación de recibos ou pago tpv virtual web. O Pazo designa para a domiciliación de recibos a conta reflectida nos datos bancarios da inscrición. O pago nas distintas modalidades farase efectivo entre os días 1 e 8 de cada mes.

8. En relación á tarifa para aboar por usuarios e demais obrigacións e dereitos, atópanse recollidos na ordenanza de prezos públicos da Deputación Provincial de Ourense, para o Pazo dos deportes “Paco Paz”, e nos acordos adoptados para a fixación dos prezos públicos. O artigo 4º da devandita ordenanza, con carácter especial, contempla os dereitos que asisten ao usuario en relación á non prestación de determinados servizos deportivos e a súa posible compensación económica. Os recibos viraranse entre o 8 e o 12 de cada mes. Os recibos devoltos pola entidade bancaria deberán aboarse mediante tarxeta bancaria na propia instalación. Non se permitirán devolucións dos abonos dos cursos.

9. As baixas como abonados deberán notificarse por escrito antes do último día do mes ou período no que se desexa poñer fin á actividade.

10. O Pazo dos Deportes poderá prohibir o acceso ás instalacións aos abonados que non estean ao corrente do pago correspondente.

11. De alcanzarse o número máximo autorizado de deportistas (cota de usuarios, aforo das instalacións, razóns de seguridade, etcétera), o Pazo resérvase o dereito de poñer ao Abonado - Aspirante nunha lista de espera en estrita orde de preinscrición, coa obrigación de

comunicar inmediatamente a existencia dunha praza libre.

Artigo 7. Réxime sancionador

1. En todo o non previsto neste artigo aplicarase de xeito supletorio a normativa contida nos artigos 139, 140 e 141 da Lei 7/1985, reguladora das bases do réxime local.

2. Consideraranse infraccións os incumprimentos das normas e obrigacións establecidas nesta normativa así como nas demais ordenanzas reguladoras e regulamentación interna do Pazo dos Deportes “Paco Paz”.

As infraccións poderán ser leves, graves e moi graves. A comisión , no prazo de seis meses de máis de dúas infraccións leves, considerase infracción grave, castigándose coas sancións previstas para as devanditas infraccións no seu grao mínimo. A comisión no prazo dun ano de máis de dúas infraccións graves considerase infracción moi grave, castigándose coas sancións previstas para as devanditas infraccións no seu grao mínimo.

3. Serán leves as infraccións que supoñan:

- a) O incumprimento das normas ou obrigacións establecidas nos apartados indicados con anterioridade, fóra das que expresamente se consideren graves ou moi graves, e das normas de réxime interior existentes así como na Ordenanza reguladora de prezos públicos.
- b) O impedimento ou obstrución á petición de identificación como usuario/a, ou non achegar reiteradamente a documentación que acredita a posibilidade de acceso á instalación.
- c) O uso sen reserva, a extralimitación do horario asignado ou a perturbación ao libre acceso nas instalacións deportivas
- d) Non aboar como usuario o prezo público por a utilización das instalacións na modalidade que corresponda dentro dos prazos e de acordo coas normas que se establezan na correspondente tarifa.
- e) Facer uso das instalacións incumprindo as elementais normas de hixiene. En particular, a introdución nas instalacións de comidas e bebidas (salvo as de deportistas), o uso dos vestiarios máis aló do aseo básico e o cambio de roupa, a introdución de elementos que obstaculicen ou molesten aos demais usuarios.
- f) Non utilizar nas instalacións deportivas a roupa e calzado deportivo adecuados, así como incumplir a normativa en materia de reposición de material e equipamento deportivo.

4. Serán graves as infraccións que supoñan:

- a) O uso indebido, vulnerando a lexislación vixente e o establecido nesta normativa, do teléfono móbil ou aparellos de vídeo gravación, á vista das restricións establecidas nos apartados correspondentes de maneira especial no artigo 3º-5 deste Regulamento.
- b) Unha perturbación importante na utilización das instalacións incumprindo as normas establecidas nesta normativa e nas correspondentes regras de réxime interior, con falta de actitude de respecto cara aos demais usuarios e persoal da instalación.
- c) A falta grave de uso das instalacións incumprindo as elementais normas de saúde e de seguridade. En particular, a introdución nas instalacións de obxectos de cristal, substancias inflamables ou perigosas.

- d) A cesión ou alugamento a terceiros das instalacións deportivas reservadas.
- e) Colocar publicidade propia das entidades usuarias con carácter fixo ou móbil en espazos non autorizados para iso.
- f) As faltas de respecto, insultos ou calquera tipo de agresión verbal a outros usuarios, persoal operario de servizo administrativo, recepcionistas e monitores deportivos

5. Serán moi graves as infraccións que supoñan:

- a) O incumprimento da lexislación vixente aplicable a instalacións deportivas en materia de tabaquismo, bebidas alcohólicas e substancias estupefacientes.
- b) O acceso ao recinto da zona de auga con enfermidades infecto-contaxiosas, salvo informe médico en sentido contrario.
- c) Os malos tratos aos usuarios e empregados do Servizo ou persoas con mobilidade reducida ou cando se utilice a violencia.
- d) Ás actitudes, condutas e exhibición de simboloxía que sexan discriminatorias en razón da condición sexual, racista, xenófoba e ideolóxica, ou que fomenten a violencia no deporte.
- e) O impedimento do uso das instalacións ou dos servizos deportivos a outros usuarios con dereito á súa utilización sempre que afecte a menores de idade ou persoas con mobilidade reducida ou se utilice a violencia.
- f) O impedimento ou a grave e relevante obstrución ao normal funcionamento do servizo público.
- g) Os actos de deterioración grave ou relevante de equipamentos, infraestruturas, instalacións e elementos, sexan mobles ou inmoables. Considéranse moi graves cando o custo da súa reparación é superior a 3.000 euros.
- h) As reiteradas faltas de respecto, insultos ou calquera tipo de agresión verbal vexatoria a outros usuarios, persoal operario de servizo ou administrativo, recepcionistas e monitores deportivos.

6. Ás infraccións leves aplicaráselles unha sanción de apercibimento a multa de 100,00 a 500,00 euros e privación dos dereitos de usuario e da utilización de instalacións de ata un mes.

Ás faltas graves aplicaráselles unha sanción de multa de 500,01 a 1.000,00 euros, ademais de privación dos dereitos de usuario e da utilización das instalacións dun a tres meses.

Ás faltas moi graves aplicaráselles sanción de multa de 1.000,01 a 3.000,00 euros, ademais de privación dos dereitos de usuario e da utilización das instalacións de tres meses a un ano. A reiteración de faltas moi graves pode levar consigo a expulsión definitiva da instalación. Con independencia das sancións que poidan impoñerse polos feitos tipificados neste apartado, o infractor estará obrigado, se fose o caso, á restitución e reposición dos bens ao seu estado anterior, coa indemnización dos danos e perdas causados.

7. Na imposición das sancións haberase de ter en conta o principio de proporcionalidade, en garantía da adecuación entre a gravidade do feito infractor e a contía da sanción para aplicar. Con todo, na imposición das sancións terase en conta que, en todo caso, a comisión da infracción non resulte máis beneficiosa para a persoa infractora que o cumprimento das normas infrinxidas.

8. A potestade sancionadora exercerase mediante o procedemento establecido na lexislación do procedemento administrativo común, e en todo caso mediante procedemento

contraditorio e con audiencia ás persoas interesadas. A resolución do procedemento corresponderalle á Presidencia ou órgano en quen delegue.

Artigo 8. Réxime de protección dos datos persoais

Os datos persoais facilitados polas persoas usuarias incorporaranse ás correspondentes actividades de tratamento da Deputación Provincial de Ourense, e serán tratados coa finalidade específica de cada tratamento, de conformidade coa regulación establecida polo Regulamento (UE) 2016/679 do Parlamento Europeo e do Consello sobre protección de datos de carácter persoal e coa Lei orgánica 3/2018, de protección de datos de carácter persoal e de garantía dos dereitos dixitais.

A lexitimación do tratamento baséase no cumprimento dunha obrigação legal e/ou o cumprimento dunha misión realizada en interese público.

O prazo de conservación dos datos será o legalmente previsto.

Os datos solicitados unicamente serán obxecto de cesión, se é o caso, tras o previo consentimento da persoa interesada ou de acordo co previsto na citada lexislación.

As persoas cuxos datos persoais sexan tratados por esta Administración poderán exercer os dereitos de acceso, rectificación, supresión, oposición, limitación do tratamento e portabilidade, así como a opoñerse á toma de decisións individuais automatizadas, incluída a elaboración de perfís, na forma prevista na lexislación vixente sobre a materia, ante o órgano responsable do ficheiro. No caso de descoñecer este órgano, a solicitude dirixirase a dpd@depourense.es.

Así mesmo, os usuarios e usuarias tamén teñen dereito a presentar unha reclamación ante a Axencia Española de Protección de Datos.

2º) O presente acordo someterase a información pública por prazo de trinta días hábiles, mediante anuncio inserido na sede electrónica da Deputación e no Boletín Oficial da Provincia, para a presentación de reclamacións e suxestións, que, no seu caso, deberán ser resoltas polo Pleno. No caso de non presentarse reclamacións ou suxestións en prazo, entenderase automaticamente elevado a definitivo o acordo de aprobación inicial.

Unha vez aprobado definitivamente o Regulamento de utilización e funcionamento do Pazo dos Deportes “Paco Paz”, procederase á publicación do texto íntegro no Boletín Oficial da Provincia.

5º.- MOCIÓN DO GRUPO SOCIALISTA SOBRE A CREACIÓN DUNHA TARXETA MOZA E A CONSTITUCIÓN DUN CONSELLO PROVINCIAL DE XUVENTUDE NA PROVINCIA DE OURENSE

D.^a Susana Rodríguez Estévez, do Grupo Socialista, expón o contido da moción.

D.^a Montserrat Lama Nóvoa, portavoz de Ciudadanos, di compartir algunhas das ideas da moción, se ben entende que agora quizá para o momento de priorizar outras cuestións máis importantes e que a moción non aclara como se dotarían os fondos necesarios. Manifesta a reserva de voto para o Pleno.

D. Bernardo Varela López, portavoz do BNG, indica que a moción tamén lle xera certas dúbidas, que xa existe unha liña de subvencións parecidas da Xunta de Galicia e que non tería inconveniente en apoiar por exemplo o terceiro punto, pero sempre que a ese consello provincial de xuventude se lle dote de finalidade.

D. José Miguel Caride Domínguez, portavoz de DO, manifesta que reserva o voto para o Pleno.

A **presidenta da comisión** indica que a moción ten, na súa opinión, unha formulación demagóxica. Sinala que xa na Xunta de Galicia existe o carné xove, cun abanico de idade máis amplo que o que figura na moción e lembra que a Deputación Provincial ten un importante programa como é o Emprendou, co obxectivo principal de darlle oportunidade á mocidade do rural.

D.^a Susana Rodríguez Estévez, do Grupo Socialista, manifesta que o carné xove esta obsoleto e é moi mellorable e que a Deputación non ten ningunha liña de axudas concretas dedicadas á xuventude.

D. Bernardo Varela López, portavoz do BNG, volve mostrar as dúbidas que lle xeran certos apartados da moción, insistindo en que as axudas que se establezan nesta materia desde a Deputación ou desde outras administracións deben ter en conta o criterio de poboación e en particular o da poboación moza.

Non se producen máis intervención someténdose a votación a moción, e ao obter o voto favorable do Grupo Socialista (3), o voto en contra do Grupo Popular (5) e a abstención de DO (1), BNG (1) e Ciudadanos (1), a comisión **non** ditamina favorablemente a adopción, por parte do Pleno, do seguinte acordo:

1º.- Instarlle á Deputación Provincial a creación dunha tarxeta moza, para que as persoas de 14 a 26 anos, residentes na provincia (estudantes de fóra residentes en Ourense incluídos), poidan desfrutar de vantaxes e descontos no comercio local, cultura, ocio, espazos deportivos, servizos prestados polas entidades locais, taxas e impostos ou transporte público.

2º.- Instarlle á Deputación Provincial a elaboración e aprobación dun programa provincial de xuventude, ao que se poidan adherir os municipios de Ourense, que permita dotar de fondos aos convenios e subvencións necesarias para a posta en funcionamento desta tarxeta moza.

3º.- Instarlle á Deputación Provincial a constitución dun Consello Provincial de Xuventude, que colabore no desenvolvemento de políticos de mocidade, onde se teñan en conta as súas preferencias e que garanta a continuidade das actividades propias para este colectivo, xa que na actualidade non hai ningún órgano, nin oficial nin extraoficial, de participación de mozos e mozas nas políticas provinciais.

5º- MOCIÓNS DE URXENCIA.- Non se presentan.

6º.- ROGOS E PREGUNTAS.- Nesta quenda prodúcense as seguintes intervencións:

D. Álvaro Vila Araújo, do Grupo Socialista, di que a semana pasada se outorgou o premio Celanova Casa dos Poetas, polo que solicita información sobre en calidade de que asistiron varios deputados do Grupo Popular.

A **presidenta da comisión** indica que lle contestará por escrito.

D.ª Margarita Pérez Fernández, do Grupo Socialista, en relación coa noticia que se puido ver en prensa no mes de marzo sobre a transferencia do Teatro Principal da Deputación ao Concello de Ourense, pregunta se se materializou a dita intención.

Intervén **don José Miguel Caride Domínguez, portavoz de DO**, para indicar que naquel momento o que existía era unha vontade de levar a cabo esa transferencia, e que se paralizou con motivo da pandemia do COVID 19 e que non se chegou a formalizar ningún convenio nin ningún documento similar.

D. Bernardo Varela López, portavoz do BNG, di que xa que este ano lle corresponde á Deputación de Ourense a organización do premio Otero Pedrayo, pide que se teña en consideración a Isaac Alonso Estraviz como un posible candidato para ser recoñecido con ese premio.

E, ás 18.25 horas, dáse por finalizada a reunión, redactándose a presente acta que se asinará electronicamente. Dou fe.

